

Ka Shithi U Judah

¹Ka jingkhublei na u Judah, u shakri U Jisu Khrist bad u para jong u Jakob.

Ha kita ia kiba la khot bad ia kiba la ieid eh da U Blei U Kpa bad ia kiba la ri kyndong ha U Jisu Khrist.

²Ka jingisynei, ka jingsuk bad ka jingieid kin nangroi kyrhai ha phi.

Ka Jingbishar Ia Kiba Leh Bymman

³Ko paralok baieid, haba nga la thmu ban thoh sha phi shaphang ka jingpynim kaba ngi la iohbynta lang baroh, nga sngew donkam pynban ban thoh sha phi ia ka ban pynshlur ba phin ialeh shitom na ka bynta ka jingngeit kaba U Blei u la ai sha ki riewkhuid jong u kaba la biang na ka bynta ki por baroh. ⁴Don ki brieve kiba la wan rung siar hapteng ka kynhun jong phi kiba la shah pynrem lypa namar ki kam sianti jong ki. La slem bah ki nongiathuhlypa ruh ki la thoh shaphang jong ki. Kine ki ialeh pyrshah ia U Blei, ki da pyntrei kam bakla ia ka jingaiei U Blei ha ka jingleh jakhlia jong ki bad ki da len ia U Jisu Khrist uba long tang ma u hi U Kynrad bad U Trai jong ngi.

⁵Nga kwah ban pynkynmaw sha phi ia kaba phi la tip lypa: Haba U Trai u la pyllait im ia la u paitlang na ka ri Ijpt, u la pynjot noh pat ia kito baroh ki bym shym la ngeit.

⁶Bad kynmaw ruh ia ki angel kiba la duh noh ia la ka iktiar da kaba ialeh pyrshah, kiba la iehnoh ruh ia ki jaka shongsah jong ki. Kumta U Trai u la khum ia ki ha ki kynjri hapoh kaba dum tliw ia ka ban bishar ha kata ka sngi kaba khraw.

⁷To kynmaw ruh ia ka nongbah Sodom bad Gomorra bad ia ki shnong kiba don sawdong jong ki, kiba long kum kita ki angel kiba ialeh pyrshah, ki la leh nuti bad kyrsum ialade ha ki jingialeh sangsih bathala. Kine ki long kum ka jingmaham ia kito ki ban shah ia ka jingpynshitom ha ka ding bymjulip.

⁸Nga long kumjuh bad kita ki nongphohsng kiba la rung hapoh ka kynhun jong phi, ki la kyrsum ha ka pop, ki la kyntait ia ka bor synshar jong U Blei bad kren bein pyrshah ia ki angel kiba dap da ka burom. ⁹Wat u Mikhael u angel rangbah ruh um nud ban leh kumta, mynba u la ia pyneh bad u Soitan shaphang ka met jong

u Moses. Hynrei wat ma u hi um shlan ban kren pyrshah ia u Soitan, pynban u Mikhael u la ong, "U Trai un pynshitom ia me!"

¹⁰Hynrei kine ki brieve ki nud ban kren bein ia kata kaba kim tip satia. Kum ki mrad ba mutlop bad ba khlem jingshemphang ki kren ia kiei kiei kat kaba wan ha ka jingmut jong ki. Kumta ki wallam halade hi ia ka jingpynjot. ¹¹Kan long kaba shykhei ia ki naba ki ia iaid ha ka lynti u Kaiñ. Ban ioh lum spah, kim salia ban aiti ialade ban bud ha ki lynti ba sakma jong u Balaam bad kum u Korah la pynjot noh ruh ia ki namar kata ka jingialeh pyrshah.

¹²Kine ki brieve ki long ka jingthohbria ha ki jingkhawai U Trai haba ki iabam lang bad phi khlem jingsheptieng. Ki long ki nongsharai kiba bsa tang ialade, kum u lyoh ba khlem um ba la rong noh da ka lyer bad kum ki dieng ki bym don soh ha ka aiom ot bad ba la rat naduh tyllong, kumta ki iap noh arsieñ. ¹³Kum ka jingsei tyrrtho ba jakhlia kaba phaloh ha ki jingatpyllung ka duriaw, kumta ki jingleh ba khlemrain jong ki kin paw hakhmat baroh. Ki long kum ki khlu ba ia id sakma ha suiñbneng, ia ka jingdum batliw tliw la pynkhreh na ka bynta jong ki junom.

¹⁴U Enokh, uba hynñiew uba hiarpateng na u Adam, u la iathuhlypa shaphang kine ki brieve: "Hakhmih, U Trai u wan lem bad ki phew hajar kiba khuid jong u" ¹⁵ban bishar ia uwei-pa-uwei. Un pynshitom ia kito baroh ki bymriewblei kiba ialeh pyrshah ia u da ki kam bymman jong ki khlem jingsheptieng bad ia ki jingkren thala kaba ki la kren pyrshah ia u."

¹⁶Kine ki brieve ha la ka sngi ki mudui bad wad daw ia kiwei. Ki ia leh ia kiei kiei kiba thala katba ki sngewmon. Ki long kiba lehmeng bad ki iaroh ia kiwei tang ban ioh jingmyntoi ialade.

Ka Jingmaham Bad Ka Jinghikai

¹⁷Ko paralok baieid, to kynmaw ba kaei ba la kren da ki apostol U Trai Jisu Khrist kan sa wan jia. ¹⁸Ki la iathuh ha phi ba, "Ha ki ia kiba khatduh kin sa don ki brieve kiba rkhe bein ia U Blei, kiba thrang ban pynhun tang ia ki jingkwah bymriewblei jong ki."

¹⁹Kine ki long ki brieve kiba wanrah ia ka

jingiakhlad bad kiba kynja doh namar ba kim don ia U Mynsiem.

²⁰Hynrei ma phi, ko paralok baieid, to pynkhlaiñ ialade ha kata ka jingngeit bakhuid tam bad da kaba duwai ha U Mynsiem Bakhuid. ²¹To ri kyndong ialade ha ka jingieid Blei katba phi dang ap ia U Trai Jisu Khrist u ban ai ha phi ia ka jingim bymjukut ha ka jingisynei jong u.

²²To pynskhem ia kito kiba artatien. ²³To knieh kynthet ia kito kiba don ha tmier ka dujok ding. Ia kiwei pat da kaba leh isynei,

hynrei da kaba husiar ialade ba ka jingim ba tngit jong ki kan ym snoh ha phi.

Ka Jingnguh ia U Blei

²⁴U Blei u long uba lah ban sumar kyndong ia phi ba phin ym kyllon bad pynieng ia phi kiba khlem jingthohbria hakhmat ka burom jong u bad ban pyndap ia phi da ka jingkmien bakhraw. ²⁵U long tang ma u, U Blei uba long U Nongpynim jong ngi. Sha u to long ka burom, ka jingkhraw, ka bor bad ka iktiar da U Jisu Khrist mynta bad ha la ka rta. Amen.